

საქართველოს უზენაესი სასამართლოს მოსამართლის თანამდებობაზე ასარჩევად საქართველოს  
პარლამენტისათვის წარსადგენი სამოსამართლო გამოცდილების მქონე მოსამართლეობის  
კანდიდატის შეფასების ფორმა

მოსამართლეობის კანდიდატის თინა ვაშაყმაძის შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	<input checked="" type="checkbox"/>	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	17	20
სამართლებრივი დასაბუთების უნარი და კომპეტენცია	17	20
წერის უნარი	18	20
ზეპირი კომუნიკაციის უნარი	15	15
პროფესიული თვისებები, მათ შორის, ქცევა სასამართლო დარბაზში	15	15
აკადემიური მიღწევები და პროფესიული წვრთნა	4	5
პროფესიული აქტივობები	0	5
ქულათა ჯამი	86	100

სახელი, გვარი: ირმა გელაშვილი

*ი. გელაშვილი*

თარიღი:

*28.05.2021*

საქართველოს იუსტიციის უმაღლესი საბჭოს 2020 წლის 7 ოქტომბრის N1/134 გადაწყვეტილებით გამოცხადებულ საქართველოს უზენაესი სასამართლოს მოსამართლეობის კანდიდატთა შესარჩევ კონკურსში მონაწილე კანდიდატის

### თინა ვაშაყმაძის

#### შეფასება/დასაბუთება

კანდიდატის შეფასებისას ვიხელმძღვანელებ „საერთო სასამართლოების შესახებ“ საქართველოს ორგანული კანონის 34<sup>1</sup> მუხლის მე-11 პუნქტით დადგენილი წესით, გავითვალისწინებ იუსტიციის უმაღლესი საბჭოს მიერ მოპოვებული ინფორმაცია და კანდიდატის საჯარო მოსმენის პროცესში გამოვლენილი გარემოებები.

**კანდიდატის შეფასება კეთილსინდისიერების კრიტერიუმით:**

ა). პიროვნული კეთილსინდისიერება და პროფესიული სინდისი - მითითებული მახასიათებლების შემოწმებისას გათვალისწინებულია კანდიდატის, როგორც მოქალაქის პატიოსნება, კეთილსინდისიერება, მოვალეობებისა და პასუხისმგებლობის შესაბამისი შეგნება, გამჭვირვალობა, კორექტულობა და სხვ. რეკომენდატორები თინა ვაშაყმაძეს ახასიათებენ როგორც გულისხმიერ, კორექტულ, გულწრფელ, გაწონასწორებულ და თავმდაბალ პიროვნებას. კოლეგები ხაზს უსვამენ თინა ვაშაყმაძის საქმისადმი დამოკიდებულებას, გულმოდგინებასა და კეთილსინდისიერებას.

კანდიდატს აქვს დადებითი საკრედიტო ისტორია, სახელმწიფო ბიუჯეტის მიმართ არ ერიცხება დავალიანება, დროულად აქვს გადახდილი საგზაო მოძრაობის წესების დარღვევისთვის დაკისრებული ჯარიმები.

ბ). დამოუკიდებლობა, მიუკერძოებლობა და სამართლიანობა - კანდიდატთან საქმიან ურთიერთობაში მყოფი პირების შეფასებით, თინა ვაშაყმაძე პრინციპული, შეუვალი და სამართლიანი მოსამართლეა. რეკომენდატორები აღნიშნავენ, რომ მას შესწევს გადაწყვეტილების დამოუკიდებლად მიღების უნარი. ერთ-ერთი კოლეგა აღნიშნავს, რომ მხოლოდ ფაქტების სწორ სამართლებრივ შეფასებას ემყარება კანდიდატის მიერ მიღებული გადაწყვეტილება, რომელიც სამართლიანი და გარეშე ფაქტორებისგან თავისუფალია.

საჯარო მოსმენაზე სასამართლო სისტემის წინაშე არსებულ გამოწვევებთან დაკავშირებით კანდიდატმა განაცხადა, რომ მთავარი გამოწვევა მოსამართლეთა მცირე რაოდენობა, საქმეთა გადატვირთულობაა, მისი თქმით, სხვა პრობლემა

სასამართლოში არ არსებობს, გამორიცხა ნეპოტიზმი, რის დასადასტურებლადაც მისივე კარიერული წინსვლა დაასახელა. კანდიდატი პრობლემას ვერ ხედავს მოსამართლეთა დაწინაურების არსებულ წესსა და პრაქტიკაშიც. კანდიდატს არ გამოუთქვამს არც ერთი კრიტიკული მოსაზრება, შენიშვნა თუ რეკომენდაცია.

თინა ვაშაყმაძე არასდროს ყოფილა პოლიტიკური პარტიის წევრი/მხარდამჭერი ან შემომწირველი. ამასთან, არ არსებობს მტკიცებულება, რომ გადაწყვეტილების გამოტანისას მოსამართლე არ იყო დამოუკიდებელი.

გ). პიროვნული და პროფესიული ქცევა - კანდიდატთან საქმიან ურთიერთობაში მყოფი პირების შეფასებით თინა ვაშაყმაძე თავაზიანი, გაწონასწორებული და კორექტული პიროვნებაა. კოლეგების თანახმად, იგი გამოირჩევა სასამართლო აპარატისადმი კეთილგანწყობით. იუსტიციის უმაღლესი სკოლის დამოუკიდებელი საბჭოს შეფასებით, თინა ვაშაყმაძე გამოირჩეოდა გაწონასწორებული, თანმიმდევრული, ტაქტიანი და თავაზიანი ქცევით. საჯარო მოსმენაზე კანდიდატი იყო კორექტული, თავდაჭერილი.

კანდიდატის თაობაზე მოძიებული ინფორმაციით დგინდება, რომ კანდიდატის მიმართ დისციპლინური და/ან სისხლისსამართლებრივი დევნა არ დაწყებულა.

დ). პიროვნული და პროფესიული რეპუტაცია - კანდიდატთან საქმიან ურთიერთობაში მყოფი პირები თინა ვაშაყმაძეს ახასიათებენ მაღალი პიროვნული და პროფესიული რეპუტაციის მქონე პიროვნებად. კოლეგები აღნიშნავენ, რომ კანდიდატი სარგებლობს პატივისცემით როგორც სასამართლო აპარატსა და კოლეგებში, ასევე, ზოგადად იურიდიულ წრეებში.

ე). ფინანსური ვალდებულება - კანდიდატს აქვს დადებითი საკრედიტო ისტორია, სახელმწიფო ბიუჯეტის მიმართ არ ერიცხება დავალიანება, დროულად აქვს გადახდილი საგზაო მოძრაობის წესების დარღვევისთვის დაკისრებული ჯარიმები.

თინა ვაშაყმაძე ჯეროვნად და კეთილსინდისიერად ასრულებს ფინანსურ ვალდებულებებს. მოძიებული ინფორმაციის თანახმად, არ არსებობს შეუსაბამო მის შემოსავალს, ფინანსურ ვალდებულებებსა და მის საკუთრებაში არსებულ ქონებას შორის.

კანდიდატის საჯარო მოსმენის პროცესსა და მასზე მოპოვებულ მასალებში არ გამოვლენილა კონკრეტული გარემოებები, რაც კეთილსინდისიერების კრიტერიუმით კანდიდატის უარყოფითად შეფასების საფუძველი იქნებოდა,

ამდენად, მივიჩნევ, რომ კანდიდატი სრულად აკმაყოფილებს კეთილსინდისიერების კრიტერიუმს.

**კანდიდატის შეფასება კომპეტენტურობის კრიტერიუმით:**

**სამართლის ნორმების ცოდნა:** კანდიდატმა საჯარო მოსმენისას გამოავლინა მატერიალური და საპროცესო სამართლის ცოდნა. კერძოდ, კანდიდატმა ისაუბრა სამეწარმეო სამართლის აქტუალურ საკითხებზე და მიუთითა სასამართლო პრაქტიკიდან მნიშვნელოვან განმარტებებზე, საწარმოს დირექტორის პასუხისმგებლობის ფარგლებზე, ფილუციურ ვალდებულებებზე, დერივაციული სარჩელის გამოყენების შესაძლებლობაზე. ნაკლოვანებად მიმაჩნია, რომ კანდიდატი არ იცნობს კერძო სამართალში არსებულ სხვადასხვა მოდელურ წესებს, რომელთა მნიშვნელობა როგორც თეორიაში, ისე პრაქტიკაში, დიდია.

აღსანიშნავია, რომ კანდიდატი არის მოქმედი მოსამართლე და სამოსამართლო უფლებამოსილებას ახორციელებს თბილისის საქალაქო სასამართლოს სამოქალაქო საქმეთა კოლეგიაში. კანდიდატის მიერ წარმოდგენილი სასამართლო გადაწყვეტილებათა გაცნობის შემდეგ შემიძლია დავასკვნა, რომ კანდიდატი სწორად იყენებს და განმარტავს სამართლის ნორმებს. რეკომენდატორები აღნიშნავენ, რომ თინა ვაშაყმაძე გამოირჩევა არა მხოლოდ სამართლებრივი საკითხების, არამედ სასამართლო, მათ შორის ევროპული სასამართლოს პრაქტიკის დრმა და ჯეროვანი ცოდნით. იუსტიციის უმაღლესი სკოლის დამოუკიდებელი საბჭოს დასკვნის თანახმად, თინა ვაშაყმაძეს აქვს კარგი თეორიული ცოდნა, რომელსაც წარმატებით იყენებს პრაქტიკაში.

**სამართლებრივი დასაბუთების უნარი და კომპეტენცია:** კანდიდატის მიერ წარმოდგენილ სამართლებრივ დოკუმენტში მსჯელობა დასაბუთებული, ლოგიკური და თანმიმდევრულია. სასამართლო გადაწყვეტილების გაცნობის შედეგად დგინდება, რომ დაცულია სამართლიანი სასამართლოს ისეთი აუცილებელი ელემენტი, როგორც არის დასაბუთებული გადაწყვეტილება. იუსტიციის უმაღლესი სკოლის დამოუკიდებელი საბჭოს შეფასებით, თინა ვაშაყმაძეს შეუძლია დამაჯერებლად და ლოგიკურად დაასაბუთოს მიღებული გადაწყვეტილება. იგი გამოირჩევა ფაქტების გაანალიზებისა და მათთვის სწორი სამართლებრივი კვალიფიკაციის მინიჭების უნარით.

აღსანიშნავია, რომ თინა ვაშაყმაძის გასაჩივრებულ გადაწყვეტილებათა სტაბილურობის მაჩვენებელი შეადგენს 88,5%-ს.

საჯარო მოსმენის პროცესზე კანდიდატმა სხვადასხვა სამართლებრივ საკითხზე საუბრისას გამოავლინა არგუმენტირებული მსჯელობის, სამართლებრივი დასაბუთებისა და აზრის ლოგიკურად ფორმირების უნარი. სამართლებრივი საკითხების განხილვისას კანდიდატი ხელმძღვანელობდა არა მხოლოდ სამართლებრივი ნორმებით, არამედ სასამართლო პრაქტიკით. მიუხედავად აღნიშნულისა, კანდიდატის მსჯელობა სიცოცხლის უფლებისა და ღირსების ურთიერთმიმართებასთან დაკავშირებით არ იყო თანმიმდევრული, კანდიდატი მიიჩნევს, რომ „პირის უფლება მთავრდება იქ, სადაც სხვისი უფლების დარღვევის საფრთხე დგება,“ რაც უფლებაში ჩარევის თანაზომიერების პრინციპთან მოდის წინააღმდეგობაში.

**წერის უნარი:** თინა ვაშაყმაძემ წარმოადგინა 2 სასამართლო გადაწყვეტილება დირექტორის თანამდებობიდან გათავისუფლების, პარტნიორთა კრების ოქმის ბათილობის, თანამდებობაზე აღდგენისა და სახელფასო განაცდურის ანაზღაურების თაობაზე. კანდიდატის მიერ წარმოდგენილი გადაწყვეტილების გაცნობის შედეგად შემძლია დავასკვნა, რომ თინა ვაშაყმაძე აზრს გადმოსცემს ნათლად და გასაგებად, სამართლებრივ დოკუმენტებს არ ტვირთავს შაბლონური მსჯელობით, რასაც ადასტურებენ კანდიდატთან საქმიან ურთიერთობაში მყოფი პირებიც. იუსტიციის უმაღლესი სკოლის დამოუკიდებელი საბჭოს შეფასებით თინა ვაშაყმაძის მიერ შედგენილი დოკუმენტები გამოირჩეოდა ტექნიკური გამართულობით. გადაწყვეტილებებს ადგენდა სწორი და გამართული წინადადებით. ამასთან, სასამართლო გადაწყვეტილების გარდა კანდიდატს არ წარმოუდგენია სხვა სახის სამართლებრივი ნაშრომი (სტატია, მონოგრაფია), რაც მომცემდა შესაძლებლობას უკეთ შემეფასებინა სამართლებრივ წყაროებთან კანდიდატის მუშაობის კულტურა.

**ზეპირი კომუნიკაციის უნარი:** კანდიდატმა საჯარო მოსმენის პროცესზე გამოავლინა კარგი კომუნიკაციისა და გამართულად მეტყველების უნარი. კანდიდატს გააჩნია სხვისი აზრის დინჯად მოსმენის უნარი, განსხვავებული აზრის მოსმენისა და გაზიარების შესაძლებლობა, რასაც უთითებენ მისი რეკომენდატორებიც. კანდიდატი საუბრობს მშვიდად, გაწონასწორებულად, აზრს გადმოსცემს ნათლად და მკაფიოდ. იუსტიციის უმაღლესი სკოლის დამოუკიდებელი საბჭოს შეფასებით თინა ვაშაყმაძეს აქვს აზრის სტრუქტურირებულად ჩამოყალიბების უნარი და კარგი თხრობის მანერა.

**პროფესიული თვისებები, მათ შორის, ქცევა სასამართლო დარბაზში:** კანდიდატთან საქმიან ურთიერთობაში მყოფი პირები თინა ვაშაყმაძეს ახასიათებენ როგორც პუნქტუალურ, შრომისმოყვარე და მიზანდასახულ პიროვნებას, რომელიც ორიენტირებულია თვითგანვითარებაზე. ერთ-ერთი რეკომენდატორის შეფასებით

კანდიდატი სიღრმისეულად ფლობს მენეჯერულ უნარ-ჩვევებს. იუსტიციის უმაღლესი სკოლის დამოუკიდებელი საბჭოს შეფასებით, თინა ვაშაყმაძემ გამოავლინა ორგანიზებულობის, პრიორიტეტების სწორად განსაზღვრის უნარი და მზაობა მაღალი დატვირთულობისთვის. იუსტიციის უმაღლესი სკოლის დამოუკიდებელი დამოუკიდებელი საბჭოს თანახმად, კანდიდატი არის თავდაჯერებული და სტრესის ამტანი.

იუსტიციის უმაღლესი საბჭოს სასამართლო მენეჯმენტის დეპარტამენტის მიერ დამუშავებული სტატისტიკური მონაცემების თანახმად, თინა ვაშაყმაძეს საანგარიშო პერიოდში (975 დღე) დასრულებული აქვს 660 საქმე, დღეში საშუალოდ 0.7 საქმემდე. ამასთან, კანდიდატის მიერ კანონმდებლობით დადგენილ ვადებში საქმეთა განხილვის მაჩვენებელი 93,1%-ს, ხოლო გადაწყვეტილების მომზადების მაჩვენებელი 100%-ს აღწევს, რაც მიუთითებს კანდიდატის შრომისმოყვარეობასა და დროის სწორად დაგეგმვის უნარზე.

**აკადემიური მიღწევები და პროფესიული წვრთნა:** კანდიდატს მონაწილეობა აქვს მიღებული სასამართლო სისტემისა და მართლმსაჯულების საკითხებზე გამართულ 12-ზე მეტ ღონისძიებაში, მათ შორისაა სემინარები საარბიტრაჟო წარმოების, ფინანსური მომსახურების სფეროში მომხმარებელთა უფლებების დაცვის, კონდიციური სამართლის პრობლემატური საკითხების, სამოქალაქო სამართალწარმოებაში ბავშვის უფლებების შესახებ და სხვ.

კანდიდატს გავლილი აქვს ტრენინგები ამერიკის შეერთებულ შტატებსა და ესპანეთში. ასევე, თინა ვაშაყმაძე, 2012 წლიდან, არის იურიდიული კომპანია „Hall, Booth, Smith P.C.“-სა და ატლანტის (ჯორჯიის შტატი, აშშ) სამართლებრივი საზოგადოების საპატიო წევრი.

თინა ვაშაყმაძე იყო იუსტიციის უმაღლესი სკოლის XIII ჯგუფის მსმენელი (2017წ.), მან იუსტიციის მსმენელთა საერთო საკვალიფიკაციო სიაში დაიკავა მე-7 ადგილი.

**პროფესიული აქტივობა:** პროფესიული აქტივობის თაობაზე მოძიებული ინფორმაციის თანახმად, თინა ვაშაყმაძე არ ეწევა სამეცნიერო და პედაგოგიურ მოღვაწეობას ან სხვა სახის პროფესიულ აქტივობას.

კანდიდატის შემაჯამებელი შეფასება:

1. თინა ვაშაყმაძე სრულად აკმაყოფილებს კეთილსინდისიერების კრიტერიუმს.

2. კომპეტენტურობის კრიტერიუმით კანდიდატს ვაფასებ 86 ქულით, კერძოდ:
- 2.1.სამართლის ნორმების ცოდნა - 17 ქულა;
  - 2.2.სამართლებრივი დასაბუთების უნარი და კომპეტენცია - 17 ქულა;
  - 2.3.წერის უნარი - 18 ქულა;
  - 2.4.ზეპირი კომუნიკაციის უნარი - 15 ქულა;
  - 2.5.პროფესიული თვისებები, მათ შორის ქცევა სასამართლო დარბაზში - 15 ქულა;
  - 2.6.აკადემიური მიღწევები და პროფესიული წვრთნა - 4 ქულა;
  - 2.7.პროფესიული აქტივობა - 0 ქულა.

ირმა გელაშვილი

*ი. გელაშვილი*

იუსტიციის უმაღლესი საბჭოს წევრი

თარიღი:

*28.05.2021*